

國

朝

列

卿

紀

國朝列卿紀卷之四十六

兵部序

夫兵部尚書者非古制也自漢制尚書五曹未有主兵之任至魏置五兵尚書謂中兵外兵騎兵別兵都兵也晉太始中省五兵尚書大康中又置七兵尚書以中兵外兵各分爲左右東宮及宋齊梁陳又爲五兵尚書後周置大司馬其屬有兵部中大夫小兵部下大夫其職並闕至隋開皇三年乃有兵部尚書統兵部職方駕部庫部四曹唐承隋制不改龍朔二年改爲司戎太常伯咸亨元年復舊光宅元年又改爲夏官神龍元年復舊天寶十一年又改爲武官至德元年復舊沿及趙宋相因不改

然皆爲尚書省屬官與周官大司馬掌邦政之意固有間矣

國初沿唐宋之制設兵部尚書侍郎之職掌天下軍衛武官選授之政令仍屬中書省洪武十三年革中書省陞六部每部分四子部各設郎中員外郎主事於是兵部其屬有四曰司馬曰職方曰駕部曰庫部二十九年改司馬爲武選駕部爲車駕庫部爲武庫職方仍舊俱稱清吏司永爲定制然國家自罷相以來政歸六部而兵部尚書侍郎卽大小司馬之職及計勞敘資往後孤是加有若大征伐大簡練有若武官勲祿品命有若圖志鎮戍烽埃有若輿輦車乘傳驛廐牧戍器儀仗之庶務靡無不統矧北狄驚桀南蠻螭集所期制變弭患以寧九有者是惟

齊忠秉義振滌頽蠹用保於有慶其或明憤憤絕弗恪修乃
事顛墜厥緒終罔攸賴矧由其能董正戎師以修王國者哉
惟兵部改置北京肇自永樂辛丑其提督團營初總於世勲宿
將自正統十四年土木之變命兵部尚書于謙不妨部事統督
軍務景泰三年該于謙會同武清伯石亨等議於五軍三千神
機營揀選精銳馬步官軍六十五萬分爲十營仍命于謙提督
天順元年又命都察院右副都御史羅通不妨院事提督本年
以邊方寧靖十營罷立總督官亦不復設八年尚書王竑奏復
置成化元年又罷之三年該司禮監太監懷恩具奏該本部議
擬復增立十二團營命兵部尚書白圭不妨部事提督十一年

自圭病故又命都察院左都御史王越不妨院事提督弘治元年又命都察院左都御史馬文昇不妨院事提督五年馬文昇改兵部尚書仍不妨部事提督於是劉大夏以後俱以兵部尚書不妨部事提督矣正德十一年給事中翟瓚奏要添設或尚書侍郎都御史一員提督該兵部尚書五瓚奏係干事體重大奉

旨不必添設至嘉靖六年大學士楊一清奏准命兵部尚書兼都察院左都御史李承勲不妨院事提督於是汪鉉以後俱以都御史不妨院事提督矣二十年以提督事重特改劉天和爲兵部尚書專一在營操練不妨以他務及二十一年劉天和致仕

率

旨勅兵部尚書張瓚不妨部事提督於是毛伯溫以後俱以尚書
提督矣二十九年北虜犯京師復改吏部侍郎王邦瑞爲兵部
左侍郎協理戎政專一操練遂定爲常制歷年提督不同但其
要在於得人楊一清謂非于謙不能定亦非于謙不能行其意
微矣今次各官年表於後其行實見於事紀其勲德茂著者表
爲列傳

國朝列卿紀卷之四十六

國初兵部尚書總論

聖祖奮神武以平多壘而天戈所指靡不歸附自洪武元年設六部而天下兵籍武官選授之政令與夫軍帥戍卒山川要害廐牧甲仗之數悉隸兵部雖命將出師授鉞闔臣而其柄未嘗不掌於大司馬及十三年革丞相升六部於是吏部主文事兵部主武事並爲要任無復權歸樞密如唐宋事矣一時本兵大臣如單公安仁吳公琳樂公韶鳳唐公鐸溫公祥卿趙公仁茹公瑄或以謀略進或以文學著類謹抑小心雅稱上旨若鐵鼎石忠義素著不預用於內至勢去數移始假重柄擁殘兵而

竟以節死亦無愧於

聖祖特達之知矣

國朝列卿紀卷之四十六

國初兵部尚書年表

陳寧

湖廣茶陵人吏員洪武元年任歷御史大夫

單安仁

直隸鳳陽人洪武元年任致仕八年再任十年致仕

安統

調山西行省叅政後卒於官

劉誠

洪武二年任人

滕德懋

直隸長洲人洪武三年任改戶部

劉貞

洪武三年任人

吳琳

湖廣黃岡人薦舉洪武四年任改吏部

樂韶鳳

直隸全椒人元末從龍洪武五年任

劉

仁

湖廣武昌人故元
泰政洪武六年任

李

澂

直隸山陽人國子
生洪武十年任

董

俊

山西太原人太
洪武十二年任

唐

鐸

直隸虹縣人元末從
龍洪武十三年任

何

禮

直隸清苑人薦舉
洪武十五年任

俞

綸

武人洪
武十六年任

溫

祥卿

浙江長興人儒士
洪武十七年任

趙

仁

山東寧海人人才洪武
十八年任二十一年卒

沈

潛

浙江錢塘人進士
洪武三十二年任

秦

達

直隸宣城人進士洪武
二十三年任改工部

茹

瑞

湖廣衡山人國子生洪武二十年任封忠誠伯加太子少保

齊

泰

應天溧水人洪武丁卯解元三十一年任

鐵

鉉

河南鄧州人國子生章除二年任

劉

雋

湖廣江陵人洪武乙丑進士永樂元年任贈少傅謚節愍

金

忠

浙江鄞縣人儒士永樂二年任兼少詹贈少師謚忠襄

方

賓

浙江錢塘人國子生永樂七年任

陳

洽

直隸武進人薦舉永樂十三年任贈少保謚節愍

趙

紅

河南祥符人歲貢永樂十五年任

國初兵部尚書行實

陳寧字

湖廣長沙府茶陵州人初名亮通經有治才元末

爲鎮江小吏從軍至金陵館于單師家太祖入金陵命諸將

言事單武人不能言令寧代爲書陳之上覽之甚喜召見擢

江西行省掾史己亥陞廣德知府辛丑除樞密院都事癸卯改

提刑按察司僉事甲辰陞浙江按察使乙巳拜中書省叅議丙

午以事降太倉市舶令洪武元年入爲司農卿八月設六部遷

兵部尚書初太史劉基奏自京師達於郡縣皆立衛所大率以

五千六百人爲一衛一千一百二十人爲一所一百一十二人

爲百戶所設總旗二名小旗十名管領鈐束通以指揮使等官

領之大小相聯以成隊伍撫綏操練務在得宜毋致紊亂空歇
有事征伐則詔總兵官佩將印領之旣旋則上所佩印於朝軍
士各歸其業復回本衛太將軍身還第權皆出於朝廷不敢有
所擅調自是征伐率以爲常寧初任兵部依基舊法不敢更易
但待屬苛厲慘刻於軍士寡恩二年出知松江府詳御史臺
單安仁一名居仁直隸鳳陽府鳳陽縣人元末兵亂安仁集義
旅捍禦鄉曲號曰青軍自稱元帥元授樞密院判官丁酉從鎮
南王字羅普化守揚州鎮南王爲長槍軍所逐安仁仍力守維
揚丁酉年太祖渡江克金陵遣人招之安仁率衆來附上
嘉其誠授元帥守鎮江署浙江副使以其軍守常州安仁事

上忠謹克効勞力屢從征伐有功其子單大舍在常叛降張士誠
後克蘇州生擒之上付安仁自處之猶以鄉舊待安仁辛丑
年陞浙江按察使甲辰年陞中書左司郎中吳元年調瑞州守
禦千戶本年陞將作司卿洪武元年正月諭安仁製太廟祭器
曰今之不可爲古猶古之不能爲今禮順人情可以義起所貴
斟酌得宜必有損益近世泥古好用古籩豆之屬以祭其先生
旣不用死而用之似亦無謂孔子曰事死如事生事亡如事存
其製宗廟器御皆如事生之儀於是造器以金塗之酒壺盃盞
每事皆入朱漆并盤盃二百四十兩及揮旒簞篋筭幃幔浴室
皆具二月諭安仁製綿布戰衣三萬襲用紅紫青黃四色八月

設六部陞書部尚書時庶務草創安仁調度有方甚稱上意
二年正月上諭安仁曰鷄鳴山祭功臣壇於上多起房子也
做廚房庫房宰殺牲池并房子但係祭祀去處務要整齊又令
委官將帶工作前去增所並基址就帶各項木料星夜併工造
成本年改兵部尚書致仕八年起山東參政懇辭未任八年
再召兵部尚書九年六月命錄用故武官有遺棄者求年致仕
二十一年加階資善大夫初安仁以兵部尚書致仕秩正三品
後革中書陞尚書正二品故安仁雖致仕以勲舊老臣有是命
年八十五卒賜祭葬

安統字

人洪武元年任兵部侍郎二年拜兵

部尚書本年十一月調山西行省叅政後卒於官

劉誠字

人洪武元年擢中書左司郎中二年

十一月陞兵部尚書踰月免官

滕德懋字思勉直隸蘇州府吳縣人元季爲江浙行省掾參政
朵耳只班討方國珍辟爲參謀渡海颶風大作舟且覆德懋神
色自若人多服其有養國珍降畱撫台州三年台人德之國
初徵擢丞相府掾從征陳友諒除知信州以才力不逮辭改建
昌同知時陳氏故臣王溥守禦建昌所爲多不法德懋以大義
律之多所悛改進知潭州再進湖廣行省左右司郎中洪武二
年十二月召拜兵部尚書二年改戶部詳國初戶部

劉貞字

人洪武元年擢臨江府知府公勤泣

事撫字有方百廢具舉民不知勞二年陞兵部侍郎三年以政績召爲兵部尚書十一月大封功臣上命貞同大都督府錄上諸將功績賜爵祿誥券有差四年調治書侍御史五年出爲轉運使後卒於官

吳琳字

湖廣黃州府黃岡縣人世詩禮名家琳性資純篤

力問學毛詩小戴記甲辰年王師平陳友諒徵用荆楚名儒詹同薦琳通經學古能文章召爲國子助教與同並教胄子琳才藻不及同至商確經義疊疊不倦同又曰我不及琳遠甚上聽政暇時召琳咨時事輒進嘉言天下陰受其賜吳元年遷浙

江按察司僉事尋改兩淮運同皆効職有才名已而入爲起居注獻納益勤洪武四年陞太常司卿尋進兵部尚書會京闈舉鄉試有司以主文請上曰琳經學優命琳與司業朱濂典試事十月具奏京師將士之數凡二十萬七千八百二十五人各定衛所五年五月丁巳有事於方丘上命琳與禮部主事朱濂選文學能賦之士以從琳選學士夏閱等從駕人皆稱爲盛典六年改吏部尚書誥詞稱琳學術旣醇踐歷尤正其來事朕博士陞僉憲司二鹽臺起居注皆稱任使茲擢長天官其量材授官計考功能使賢愚有別而黜陟合宜斯副朕意詳國初吏部

樂韶鳳字舜儀直隸滁州全椒縣人元末兵起鳳有經世之志至正乙未謁太祖於軍門與語奇之是秋扈蹕渡江叅贊軍事從下金陵丁酉年授江南行省管勾洪武三年授起居注四年遷給事中尋進中書左司員外郎本年陞兵部侍郎六年陞兵部尚書正月戊午上念天下既定恐中外將卒習於安逸遂弛武藝命同省臺督府定議教練軍士法凡騎士必善馳射及用鎗刀步兵必善弓弩及刀鎗凡射十二箭內有六箭遠可到近可中者爲中式并定賞罰各有差本年六月改翰林院侍講學士詳國初國子監祭酒

劉仁字

湖廣武昌府武昌縣人卽劉任故元四川行省叅


湖廣武昌府武昌縣人卽劉任故元四川行省叅

政仕僞夏爲右丞相洪武四年 上以僞夏明昇據蜀阻聲教
又寇歸州漢中命湯和傅友德廖永忠分道並進及永忠乘勝
次銅鑼峽明昇與仁等大懼仁勸昇奔成都昇母彭氏泣曰事
勢如此縱往成都不過延命旦夕何益仁曰然則何如彭氏曰
大軍入蜀勢如破竹不如早降以免生靈於鋒鏑昇乃遣使往
永忠軍納款永忠以湯將軍未至辭而不受癸卯湯和引師至
重慶會永忠於朝天門外是日夏至昇面縛啣壁與母彭氏及
仁等奉表詣軍門降永忠解縛承制慰撫下令諸將不得侵掠
仍撫諭向大亨戴壽家屬令其子弟持書往成都招諭遣指揮
萬德等送昇家屬并降表於京師 上畱仁侍左右六年察其

不欺擢兵部尚書在部無所建明七年出爲廣東行省叅政九年召爲應天府尹十年調左通政諭之曰壅蔽於言者禍亂之萌專恣於事者權奸之漸故必有喉舌之司以通上下之情以達天下之政昔者虞之納言唐之問下省皆其職也今以是職命卿等官以通政爲名政猶水也欲其常通無壅遏之患卿其審命令以正百官達幽隱以通庶務當執奏者無避忌當駁正者勿阿徇當敷陳者勿隱匿當引見者無畱難毋巧宦以取容毋苛察以邀功毋讒間以欺罔公直清亮以度厥心庶不負委任之意後卒於官

李激字■直隸淮安府山陽縣人洪武初年由國子生授考

功監令有幹濟才五年陞兵部侍郎自單安仁再起兵部尚書
事體練達然年老不可煩以政事及十年安仁致仕 上喜激
強果可任特陞兵部尚書十二年以事免官

董俊字  山西太原府太原縣人洪武初舉人才擢萊州府
知府爲政廉平寬猛得宜民樹碑頌其美九年陞兵部侍郎十
二年以政績陞兵部尚書十三年三月 上革中書省陞六部
正二品戒之曰識山川之險易嚴烽堠之分明尋令挨無籍貫
軍經十次回申者卽爲開豁未幾以事免官

唐鐸字振之直隸虹縣人元末兵起初守濠州庚子從 太祖
攻江州授西安縣丞召還除中書管勾出知延平府洪武三年

召爲殿中侍御史四年正月己亥御史臺進憲綱四十條 上覽之謂鐸等曰元時任官但貴本族中國之士不得入風憲豈皆公道朕之用人惟才是使無問南北風憲作朕耳目任用得其人自無壅對曰臣聞元朝遣使宣撫民爲之語曰遣使宣撫問民疾苦來若迅雷去若敗鼓至今羞之 陛下一視同仁任官惟賢九重風憲明立法度所以安百姓興太平也未幾復出知紹興府陟刑部尚書改太常寺卿守制家居賜食半俸服闋轉兵部尚書遷諫議大夫十七年四月己丑 上謂鐸曰人有公私好惡不同故其言有邪有正正言務規諫邪言務阿諂謗言近於忠諛言近於愛惟不惑於謗言則聽日聰而讒人自去

不眩於諛言則智益明而佞自絕矣鐸對曰聽言之難自古爲然惟不爲所眩惑則讒佞自遠上曰朕日總萬機所行有得失非資人言何由以知故廣開言路以來衆言言有善者則獎而行之言之非實亦不加罪惟讒諂面諛者決不可容也尋以事左遷監察御史十八年陞右副都御史十九年復陞刑部尚書三十一年復爲兵部尚書太祖諭鐸曰各衛所軍有逃故者令本管編成圖冊送兵部照名行取不許多差人各府勾擾州縣類造軍戶文冊遇有勾丁按籍起解其民匠充軍者月支米八斗牧馬軍士支一石及后復令民丁邊軍操練者月支米一石二十二年置詹事院秩正三品上謂吏部侍郎侯庸曰

今東宮官屬詹事未設衆務無所統領兵部尚書唐鐸爲人謹厚有德量可當是任其以鐸爲詹事仍兼尚書之祿詳詹事

尙禮字

直隸保定府清苑縣人洪武初以才行異等舉

十三年陞兵部侍郎十五年擢兵部尚書奏

准令廣東廣西福建浙江湖廣江西布政司淮安蘇州等衛馬草不許科收馬料不許支給其各衛軍士有年老及殘疾有丁男者許替役管軍官不許生情留難違者悉坐以罪十六年奉旨令僉四府之民有占田四十頃以上者出上馬一匹三十頃以上者出中馬一匹二十頃以上者出下馬一匹後又命各處驛馬不問官給自備其孳息聽令貨鬻惟爲事給軍馬匹有孳生

仍令報官又奏准天下衛所善於射者十選其一於冬月農隙輪班赴京校試不中者罰其指揮千百戶中者賞鈔五錠連中者三錠不中者亦給道里費各邊軍士就於本衛較射本年以事免官

俞綸字

人洪武十五年任兵部侍郎十六年

擢兵部尚書十七年致仕

溫祥卿字

浙江湖州府長興縣人原籍山西因兵亂流寓

長興通陰陽家學丁酉年

太祖命元帥耿炳文劉晟下長興

延禮祥卿用其策分兵據要害

太祖因改長興爲安州立元

帥府以耿炳文爲都元帥劉晟爲副元帥統兵守之及是士誠

遣左丞潘原明嚴再興率衆來寇屯上橋炳文與成擊之擒斬三百餘原明遁去炳文部將費聚復追至鎖橋斬首三百級自是寇退走不敢犯者四年祥卿贊畫居多洪武二年授大都督照磨三年改秦相府錄事九年陞長史十二年出守儋州未幾改太原府同知歷任明敏有爲公廉不擾十七年召拜兵部尚書五月庚寅 上諭祥卿等曩以雲南諸蠻憑恃險阻弗遵聲教擾我疆場納我逋逃邊鄙之民漸罹其害遂命將出師討其不臣今西南諸夷悉已平定凡從征將士已各加封賞酬其勤勞獨念死者永違鄉土不得收葬誠可哀憫爾兵部移文有凡征南將士有死者悉爲收其遺骸給棺葬之十八年以罪降刑

部主事歷四川左布政使卒於官

趙仁宇

山東登州府寧海縣人洪武初以人才舉薦五軍

都督府斷事審獄平允爲上眷知十七年特陞都察院右副

都御史與左都詹徽等並振風紀十八年陞兵部尚書十九年

八月奉旨令從征沒陣者子孫襲職陞一級二十年四月奏

奉欽依凡公侯駙馬伯出使其僕從及諸藩府使人無符驗

者不得擅乘驛傳船馬後以在外諸司不守成法泛濫給驛定

公差人員除應給外其餘尋常事務及各王禮節往來並不許

馳驛有擅應付及假以軍情爲由馳驛者處死又奉旨遣使

籍杭湖嚴衢金華紹興寧波及直隸徽州等府市民富實者出

馬充鳳陽宿州抵河南鄭州驛馬二十一年正月河間阜城驛
馬戶以孳生馬來進 上曰馬戶應殺惟仰於馬然芻豆之給
其費不輕故嘗命兵部榜諭凡驛馬孳生聽民畜賣今復有來
進者豈朕言不信於民耶無乃有司奉行之未至也其卽還之
本年卒於官

沈潛字尚賢浙江杭州府錢塘縣人洪武乙丑進士授工部屯
田司主事勤於庶務以明敏稱二十年命試兵部左侍郎二十
二年陞兵部尚書三月奉 旨禁武臣不得預民事先是命軍
衛武臣管領所屬軍馬除軍民詞訟事重者許約問外其餘不
許干預至是廣西都指揮耿良造譙樓令有司起發民丁科歛

財物貴州衛造軍器亦擅科民財違越禁例至是申明其禁凡外諸司衛所遇有造作千戶所移文達衛衛達都指揮使司都指揮使司達五軍都督府奏准方許興造其合用物件并自官給毋擅取於民違者治罪五月奉 旨令都指揮原係世襲都指揮使者出職仍授世襲指揮使都指揮同知者出職仍授指揮同知俱遞降一級後又奏准祖從軍父爲事典刑襲祖職父從軍兄爲事典刑襲父職父從軍就爲事典刑者發充軍二十三年五月命各部掌印官更署改工部尚書誥曰昔聖人之世淳朴民俗敦厚宮室什器制不飾華故所司之工皆無異技奇巧然而功務雖簡其成也必精其廢也必當故一舉而無再爲

一廢而無再造所以民逸者多勞者少因是而臣稱賢君稱聖
後之受職任事則不然矣凡師事之際或務爲淫巧以勞人或
假公營私而害政所爲如斯其有福臻而愆消者否也所以古
人重其事而選用必在得人今朕設工部必法古制特以爾潛
爲工部尚書當敬事信工無弊上下汝爲良哉未幾復爲兵部
尚書奉 旨令天下衛所一戶充軍二名者免一爲民本年以
事免

典故紀聞曰 太祖嘗與兵部尚書沈潛言興治之道當進君
子退小人潛對言君子小人粹米易識 太祖曰獨行之士不
隨流俗正直之節必異庸常譬如良玉委於污泥其色不變君

不雜於衆人德操自異何難識也

第

秦達字文用直隸寧國府宣城縣人洪武十八年由國子生取
乙丑進士歷事都察院奉檄清理囚徒寬嚴得體太祖嘉其
賢能特擢工部右侍郎有大興作多不召尚書止召達議十九
年議定工匠驗其丁力定三年爲班更番復赴京輪作每月如
期名曰輪班匠行間達復議量地遠近爲班次且置籍爲勘合
付之至期賫至工部聽發免其家徭役著爲令諸匠便之七月
上以達在任公勤詔有司復其家二十年正月 上謂達曰春秋
之世人紀廢壞孔子以至聖之資刪述六經使先王之道晦而
復明萬世永賴功莫大焉夫食業則思樹藝之原衣帛則思養

蠶之始皆重其所從出也孔子之功與天地並立故朕命天下
通祀以致崇報之意而闕里又啓聖降神之地廟宇廢而不修
將何以妥神靈詔來世爾工部其卽爲修理以副朕懷二十二
年陞工部尚書五月 太祖以古帝王廟地界通衢藝而不嚴
乃徙建于欽天山之陽達以是月做廟功成自三皇五帝繼以
三代兩漢唐宋元元勲碩德比侔者別像於庭袞冕輝煌 上
甚嘉之二十三年五月詔各衙門掌印官吏更易改兵部尚書
誥曰兵始黃帝至周爲備國君之軍六諸侯之軍三將率之左
右副將副之偏裨二將叅贊之其征戰將則爲隊長於是乎張
九伐之威天下定民樂康然將之職有警則受民而行者也其

軍之資給功過之等第必有屬焉故主兵曹以總其務所期甲
仗精旗幟明戈矛必利橋梁舟車無不具備前期清道使無暴
尸則軍士氣壯武勇自備於此之職非忠良之士奚稱此任朕
今以爾爲兵部尚書爾其敬慎乃職毋怠於是使兵備脩明朕
惟爾嘉懋哉未幾復以達爲工部尚書詳國初工部

茹瑞字



湖廣衡州府衡山縣人自幼有大志嘗掃書室題

詩云此室此室常不掃看看徧地生塵草丈大焉事一室間我
欲掃之天下好識者知其不凡洪武中由國子監生擢吏科給
事中十五年陞通政司右叅議十七年陞左通政善於其職

太祖特加眷注

御製大誥曰諸進士監生立志成人特以目前

居官有效者指示而激勸之如通政使蔡瑄左通政茹瑺戶部侍郎楊清工部侍郎秦達皆同時由進士監生而登顯職各官乃能率職以稱朕心其操也恪尊先賢之道故能伸於羣職之上惟夙夜在公而已所以其家稅糧不供差徭不役有司吏卒無有登門者其各家祖父伯叔年高者朝涉田園以爲樂夕撫兒孫以爲懽或有居市者隨其所以而遂其情上無科差之擾下無隣里相欺之患如此指示諭之十九年詔復其家二十年陞通政使六月命勞西平侯沐英二十一年命勞永昌侯藍玉二十三年改右副都御史本年試兵部尚書二十四年奏准凡武職父在見任不封嫡繼母在所生庶母不封再醮之

婦不封嫡繼母已故所生母見在合照子職封嫡母所生母俱
故止贈嫡繼母在嫡母已故合封繼母贈嫡母兄從軍弟襲其
職合封贈父母伯叔從軍姪代襲者係爲人後合封贈伯叔父
母襲祖職者止封贈本父母其致仕官陞除不與陞授止與原
授後又令義男襲義父姓者當封贈義父母若出姓者不封贈
其親父母亦未得封贈若本官以後立功陞職者許封贈親父
母若代義父總旗先鋒自役後自立功得官而尚隨義父母出
姓者封贈親父母女婿承襲妻父職者封贈妻父母若代妻父
總小旗役後自得官者當封父母二十五年加太子少保仍兼
兵部尚書併給其傳夏四月條例舖兵接遞禁例凡急遞舖接

送公文必須辨認果是鋪鋪兵方許交領有詐冒押解赴京在外衙門者應遞公文人兵當官交領其差使人員有公文亦須經由所在官司辨驗方許接遞公文凡有人於中途鋪分接下公文不係知識者許鋪司兵拏解赴京其有司官吏鋪長司兵有公文不行明白辨驗輕易接遞致令別生事端者俱治以罪又奏准衛所總小旗補役以併鎗勝負爲陞降遇有應併人役到部照依比試事例行移會官於都督府監併其總小旗亡故親男弟姪女婿能併鎗者俱准併勝者補原役護衛總旗併鎗免赴京雲貴四川兩廣從本都司官監併福建遼東陝西山西行都司俱照此例後令異姓併鎗得勝者受役年月從本身始

不勝者總旗子降小旗小旗子降充軍異姓不分總小旗名下
俱充軍不勝者俱不許再併其在陣失陷傷故殘疾出海運糧
覆沒者補役免併鎗又陳言故河南都指揮使弟羽無嫡嗣有
庶子皆幼請所宜立 上曰庶子論賢不論長第給以羽之
祿俟其長擇賢者襲之二十七年正月奉 旨令武官舍餘年
十五以下者許入府州縣學讀書土官無子者許其弟襲職三
月復奏稱凡內外指揮千百戶子弟未及二十歲者襲職至年
二十乃比試年及者卽與試初試不中襲職署事食半俸二年
後再比中者食全俸仍不中者降充軍雲貴土官襲職乃免比
試其指揮千百戶陣亡物故者無子弟有父母妻給全俸三年

後給半俸有子弟年幼者亦同候襲職給本俸或以叅隨歷練未及授職者給半俸其病故無子弟有父母妻者給半俸終身子弟年幼者初給半俸次年又半俸次年又半之及襲職給本俸叅隨未及授職者亦給半俸軍士陣亡或給糧三年或給月米六斗或令有司給其家屬行糧送至京優給又奏定凡武臣在任身故及征傷失陷者自指揮至所鎮撫妻並給米五石終身無子孫者如之爲事故無承襲者不給九月奏定凡宿衛軍士務正身不許頂當直者父母妻或死喪或因病或本身有病或嫁娶或公差或因事被監種植蔬菜五穀看守果木或婦人產難皆是軍人有妨上直之事亦許准說京軍不出百里之外

有死喪慶弔許告假本管官吏卽時准告放行以快人情其當
直軍千戶差調百戶各卽本伍軍旗不許折散隊伍軍有暴疾
本管軍旗卽放歸營所請醫調治或看視遲慢放回猶豫致令
病甚親管小旗杖一百總旗杖九十百戶准俸半月其軍人別
無餘丁或父母染病許在家侍奉不拘幾時詐冒者罪之單夫
隻妻者妻有病許看視妻室病痊上直或點大軍疾病不許扛
擡赴點凡赴點幼軍年十三赴點凡一應關請有孕婦不許入
內違者本管官旗杖一百若不令官旗知會匿孕婦私入者罪
坐本婦守衛諸門有人出入不由本門者雖係國戚亦擒拏
守衛官員當直時須待朝後辰時乃許交班其內官內使出入

須要比對銅符依前搜檢其各處進納官物長解及內府諸色人誤帶鈔貫等物入門搜檢止當放寄方許進門搜檢潔淨時候出門搜出有帶出物件即時拏奏其官員軍民人等入奏事務守衛官軍人不許問其緣故所持文書亦不許開視隨卽徑直引奏若擅問緣故及將文書開看者依律問罪二十八年四月嚴民戶給養馬匹先是令飛熊廣武等衛每五戶養馬一匹各領於監官至是革各監命有司提調孳牧江南一十二戶養馬一匹江北五戶共養一匹內丁多家充爲馬頭專一養馬餘令津貼錢鈔以備倒失買補之用不許輪流有仍輪流及令孤寡殘疾一槩出辦者發邊衛充軍如馬頭家畜不許令於貼戶

家看養兒馬一匹配騾馬四匹五萬立羣頭一人五羣立羣長
一人每羣長下選聰明子弟二三人習學醫看治馬匹凡補領
或孳生三歲騾駒每二年納駒一匹六月奉 旨凡亡故征傷
武官子弟襲職如有試弓馬不中仍令還衛署事與半俸二年
後復比試不中者降爲軍二十九年四月制補役之法塚卽軍
有幼男在伍者免勾丁生員應起解者起送翰林院考試成效
者開伍發回讀書不成效者照舊補役七月立殺獲倭賊賞格
凡沿海指揮千百戶獲倭艘及賊者陞一級賞銀五十兩鈔五
十錠在船軍士擒殺獲倭賊一人者賞銀五十兩陸地交戰生
擒殺獲一人者賞銀二十兩三十年三月 上勅瑞等曰巴茶

自國初徵派累年西番易馬近因私茶出境致茶賤馬貴不獨
國課有虧殆使戎羌放肆生侮慢之心蓋由守邊者不能禦防
或濫交無度縱放私茶或假朝廷爲名橫科馬匹以致番人悖
信朝廷初不知此但謂西番不順豈知邊吏有以激之故常命
曹國公李景隆賫金牌勘合直抵西番以傳朕命各番首領受
牌爲符契以絕奸欺尚恐邊衛將士巡防不嚴私茶出境爾兵
部備傳朕意諭守邊者知之於是瑞具禁約事宜遣人賫諭川
陝守邊衛所仍遣僧管着藏卜等往西番申諭之四月以各處
宣慰安撫等土官承襲先時皆本布政掌行及是以其職專掌
土兵也乃改隸兵部其陝西潼關四川瞿塘亦隸之以其險要

也各府州縣巡檢驛傳土官亦然土官無子其弟女婿爲夷民
信服者許其襲職或許其妻襲職若指揮千百戶子孫應襲者
若無文書亦不許襲未幾 上以武官多私役軍卒踰法制命
兵部考定其役人類於是瑄等議指揮使及同知六人僉事及
千百戶衛所鎮撫四人皆於正軍伍內取用輪 更直每三日
一易下直則歸隊伍操練凡衛所直廳六人守門二人守監四
人守庫一人正選老軍充役每月一更直奏 上以正軍占役
太多宜減其數指揮使至僉事人四人千戶以下人三人百戶
以下人二人每三日一更餘如所議著爲令三十一年改吏部
會刑部尚書暴昭誣以賊罪黜爲河南左布政使歲餘召復兵

部尚書 文廟入正大統以功封忠誠伯仍加太子少保兼兵部尚書止終本身仍錫券文曰咨爾兵部尚書茹瑄威儀山立器宇淵深執德不回秉心無競昔受知於 太祖遂列位於上卿三至納言夙夜惟允一魁御史柏府生氣既輔青宮又領司馬二十餘年恩寵如一是以 太祖有內外一人之語 朝廷有中流砥柱之褒而卿能特立有持念 太祖恩澤之在躬以社稷安危爲已任非仁義不談以忠亮自守推誠竭力器物咸熙令聞昭著於四方乃心惟在于王室爰嘉爾績簡在朕心已未修 太祖寶錄勅瑄同李景隆曰昔 皇考太祖高皇帝順天應人開基啓運自布衣提三尺劍十數年間創刈羣雄混一

六合功成治定制禮作樂身致太平垂四十年功德之勝亘古
莫倫比者建文所脩實錄遺逸既多兼有失實朕覽之或有歉
焉今命儒臣重加纂修務在詳備庶幾神功聖德明昭日月
垂裕萬世爾景隆國之懿戚自少暨壯服事 皇考廟謨睿略
多所聞知今特命爾監修瑞祗事 先帝多歷年載信任彌篤
常時 聖政爾所悉焉其爲之副尚端乃心悉乃力用著成一
代之盛典豈惟仰荅 先廟寵遇之厚亦以副予惓惓之孝誠
欽哉永樂元年遣瑞往陝西管長安郡主府第七年以事下獄
卒於獄

齊泰字

應天府溧水縣人洪武丁卯發應天府解始名德

受知于

太祖改賜名筮仕禮部主事一日雷震護身殿

上躬禱於天擇九年無過官員陪祀泰與焉乙亥遷兵部左侍郎
三十一年戊寅進本部尚書常被召問邊將姓名泰歷數無遺
又欲考諸圖籍泰出袖中手冊以進甚悉自是益承眷遇閏五
月太祖有疾不召諸子入侍亦不令聞知及大漸將傳位

皇太孫泰預受顧命輔之時諸王自秦晉外皆尊屬又皆所在各
屯重兵專制於國地嫌勢偏恐由擁兵來京朝廷不能阻乃
詔諸王哭臨各於本國上又遣泰使燕燕賂之泰皆受而
歸請以爲兵費上奇其識泰憤宗戚權重而朝廷勢輕思
所以裁抑之遂與大常卿黃子澄各建議削奪之策命將出師

多其籌畫嗣君惟召學士輩討論周官法度處便殿弄柔翰而已
詔問外事一以付泰遂移檄指斥親藩或難之泰怒曰名
正言順敵乃可服是何言耶語聞 成廟因是稱疾復遣人奏
事救周王泰請執而訊掠得其情會燕長史亦上變遂力主征
討內臣賁 勅符追護衛官屬靖難師起首以誅齊黃爲名泰
以谷王漏師遁還慮遼王遂留之於是天下勤王兵稍集始戰
猶有勝負及勢不可支 朝廷詔謫其官以求解兵燕兵進益
急復召泰返而嗣君出走矣泰追之不及奔廣德州圖再舉旣
而被執泰抗辭不屈赤其族

今言曰 洪武三十一年六月武官選簿齊泰由兵部左侍郎

進尚書至建文元年十一月二十三日附選齊公已不僉名十
二月初七日選則茹瑺爲尚書併公姓亦不載矣豈北平事急
公有軍旅之役耶近見新官供詞往往有云鄭村塢殺敗齊尚
書軍馬者豈公時輟部事理戎務耶或謂公倡晁錯之議及北
平兵起復偃然居守令庸懦如景隆者爲元帥卒以誤國豈公
固未嘗居守耶據選部如此附之備考

增

鐵鉉字鼎石河南南陽府鄧州和豐鄉人洪武間由國子監生
授禮科給事中調都督府斷事奏對詳明太祖喜之賜字曰
鼎石是時羣臣奔走奉職各懷救過不贍鉉獨以才能稱上
住使數被命讞法司疑獄有聲成廟在燕邸有言國事者

太祖召法司推問數日獄未成 上怒屬鉉鞠之片時而成由是
益愛之未幾遷山東布政司叅政庚辰靖難兵起曹國公李景
隆駐師德州鉉督漕運飛芻輓粟水陸並進未嘗缺乏至臨邑
間景隆已敗軍南奔道遇叅謀高巍遂協募兵共守濟南城

成廟至城下圍之數匝不能克鉉在兵間每出不意擊敵兵皆破
城被攻壞者輒完築 成廟苦之一日許門開縱令將士解甲
出降 成廟信之整車駕入鉉豫於城上潛置板如期壓之幾
爲所中凡相守三月餘敵兵數不利乃棄去事聞於朝下詔褒
美賜以金幣封三代如其官入 謝賜宴陞右布政使尋進兵
部尚書佐大將軍歷城侯盛庸總天下兵壬午四月靖難師至

宿州鉉奮擊大破之於小河中原震動當是時 成廟恐事不濟幾欲棄師北還已而用姚廣孝及諸將佐言且戰得大勝遂長驅渡江時鉉猶擁殘兵淮南規圖興復而大勢已去矣 成廟卽位用計擒至相傳爲一厚愛飲於山巔醉而縛之鉉入覲反背立庭中正言不屈 上令其一顧終不可得 命截其耳鼻亦不顧 成廟令割其肉納其口中使食之甘否鉉曰忠臣義士之肉有何不甘遂碎分其體罵不絕聲時壬午十月十七日比年三十七鉉以非常之才拒難奉國遭天命已改不能有所成然剛不少屈撓自其蚤歲受知 高廟已負託孤寄命不可奪之節後卒於志不屈 成廟後亦每對羣臣稱其忠云

守溪長語云鐵鉉色目人也爲山東布政文皇靖難師至城
下攻之百方隨機設變終不能下文皇擊其城破鉉書
太祖皇帝牌懸城上師不敢擊鉉終不下後姚廣孝獻計曰師老
矣不如舍之而去文皇入正大統擒鉉至殺之其家屬發教
坊司爲樂婦鉉有二女入教坊司數月終不受辱有鉉同官至
二女獻以詩文皇曰彼終不屈乎乃赦出之皆適士人長女
詩曰教坊脂粉洗鉛華一片閑心對落花舊曲聽來猶有恨故
園歸去已無家雲鬟半挽臨粧鏡雨淚空流濕絳紗今日相逢
白司馬尊前重與訴琵琶其妹有詩曰骨肉相殘產業荒一身
何忍去歸娼淚垂玉筍辭官舍步蹴金蓮入教坊覽鏡自憐傾

國色向人休學倚門粧春來雨露寬如海嫁得劉郎勝阮郎

弇山堂別集曰李文達天順日錄紀鐵鼎石死義事甚烈二公

同鄧州人故知之王文恪紀聞謂公死後二女入教坊數月終

不受辱有同官至二女爲詩以獻 文皇乃赦出之按二詩首

章所謂今日相逢云云不知同官者何人乃敢以此詩聞 上

乎二章所謂春來雨露云云亦似已嫁後詩也按立齋閑錄云

公于三十五年十月十七日典刑于福安發池河千戶所充軍

大康安在鞍轡局病故妻楊氏送教坊司病故女玉兒四歲送教

坊司文恪以精核名而所紀之不審如此二詩必出好事者然

當時以鐵非內朝臣故數窘 上且不屈而尚未至族誅

補

劉雋字子奇湖廣荊州府江陵縣人曾祖伯華祖貴甫慶積于
躬鄉里歸重父從政益修善聞實有加一日夢天降赤幟上書
雋字是夕雋生會鄉先生命名符於夢因以雋爲名幼磊落不
羈讀書日記數千言下筆成文蔚然可觀旣壯志益堅平居言
不出口遇事剖決有道鄉人皆奇之曰異時公輔之器必此子
也洪武乙丑登進士改翰林庶吉士擢駕部主事陞郎中革除
中遷右侍郎尋改侍中成祖入正大統復改兵部左侍郎本
年陞尚書總制邦政綱舉目張十二月命嚴武臣冒襲之禁初
上卽位念諸將勤勞旣老而無子孫弟姪者特許養子及婿襲職
一次以終養之用報前功其後有實緣易姓冒襲者故特禁之

永樂元年 上諭雋等曰從朕平內難將士已論功陞賞朕念九門者其功最先且難可再陞一級功小不在陞例者亦陞一級陞未及數與未陞者通陞之又定軍功襲職例凡軍官舍人旗軍餘丁或自願報効或選令征進曾歷戰功陞授職役亡故者其子孫承襲無子其父兄弟姪見授職役小者俱准承繼職事相等無應襲者義子女婿不許承襲若先不曾立功就與職役後亦無戰功亡故者不許承繼指揮千百戶子孫隨征有功先已陞指揮千百戶後入征進有功陞職准襲不曾征進者不准致仕官守城或征進有功亡故年老告代者原代職子孫亦嘗隨征進或曾任北京衛所職事及見支優給職任小者就與

父兄所陞職事若職事相等不許令次子孫別襲若原替職子孫不曾於北京衛所任事次子孫曾隨征或於北京守城其父祖欲令襲授所陞職者聽原替子孫革閑四年丙午日南于紀王師問罪釋廷臣有文武全才者總督軍務雋首受一命運籌畫策夜以繼日師壓賊境罔不克捷旣曰彼無辜愚人爲渠魁所脅旣獲无惡餘孽可以恩結之日南之民幸得以靖五年凱旋上深嘉之六年餘孽嘯林堡搆患愈深朝廷以雋聲威昔者夷賊攸伏仍遣與大將軍黔國公往勦之雋曰此行吾當盡除逆賊以死報國師行萬里直抵化州夷人聞之懽忻鼓樂獨元首抗令不服雋晝夜不遑好謀慮勝總戎有莫能往者卽親冒

矢石分軍前後掠敵所至輒有奇效一日以前軍得捷襲寇至
大安海口遇颶風大作揚沙走石晝夜莫辨南北進則人馬難
行退則敵衆掩合乃長吁曰天平天平夷賊夷天我實奉天遭
此時如此豈天未欲邊民平治也耶口誦羅隱詩曰運去英雄不
自由時且戰且行略無退意卒致後軍弗前勢孤援絕遂陷賊
圍用言挑之爾若順我共享富貴保全爾生雋厲聲大罵逆賊
弗恭殘虐我百姓擾害我邊疆我前奉 命來討不肆戮殺撫
安而還豈我之兵威不振耶特彰 聖天子好生之德也不料
爾惡罔悛復勞 天討今日之逼氣數爾賊戲曰可一揖縱公
生雋復罵賊曰 堂堂天朝衣冠大臣豈屈爾腥羶犬羊之下

乎劉尚書雖死天朝豈無劉尚書乎王師復至爾輩死無遺
類口誦杜甫題諸葛亮詩曰出師未捷身先死長使英雄淚滿
襟賊見不協鼓衆而進遂遇害事聞上悼慟不已爲之輟朝
皇太子諸王皆遣祭名公鉅卿各爲詩歌以輓之後皇太子卽
位是爲仁宗猶嘉慕之遣官諭祭賜以誥命贈榮祿大夫柱
國少傅謚曰愍節官其長子奪爲給事中

典故紀聞曰成祖問兵部尚書劉雋今天下畜馬幾何雋對
以兵興耗損所存者二萬三千七百餘匹成祖曰古者掌兵
政謂之司馬問國君之富數馬以對是馬於國爲最重我朝置
太僕專理馬政各軍衛皆令孳牧卿等宜嚴督所司庶有孳息

之效

增

金忠字世忠浙江寧波府鄞縣人自少慷慨闊達負義氣壯遊京師遂遊齊魯趙魏以達於京居北京二十年成廟初舉義靖內難布衣入見署紀善遂從征伐明年署長史又明年陞工部侍郎永樂二年陞兵部尚書兼詹事府詹事忠事上敬慎小心每被顧問知無不言退未嘗泄以是益見禮遇而委任益篤焉輔導儲君以正直自持言無不盡尤見優待遇同列論事徑情直發不肯持兩端依阿而虛已服善沛然如決江河注之海也兵部機務繁劇嘗推讓同官之賢能或一事失當則必自引咎人有片善必稱之雖有素與忠異意者其人有他善未嘗

不稱也里人有數窘辱忠及爲尚書時其人補吏來京師懼不
爲容忠薦用之或曰彼不於公有憾乎曰顧其才可用奈何以
私故掩人之長尤好獎掖善類士有得一官而往見者必戒之
曰國家待士厚所望爲民造福耳所至一以濟物爲務聞人出
片言語涉暴刻輒艷然色變且襟懷坦夷神情灑落政務之暇
朋徒往來酒一壺棋一局詠歌談謔相得也事兄世華盡恭撫
兄子如子篤交誼朋友卒其子無依爲長育之亦有長育之而
爲娶婦者其他賙貧乏恤喪塋所濟尤多博於史學每論當時
成敗治亂之故娓娓千數百言不竭其源委折曲歷如身親覩
之者十三年卒於官年六十三初病且革尚書蹇義侍郎盧淵

往候之間所欲言忠曰命至此何言獨念忠始以一夫見上
歷數年位列六卿寵極貴盛而未嘗效分寸之報忠卽死能瞑
目哉已而顧其稚中兒謂二公曰忠不能報上恩矣士奇必
志士所以寵我者銘我庶幾兒長而或有知也訃聞上爲
文祭之有曰殫竭心膂克勤厥職殫心慎密始終無間皇太
子爲文祭之有曰能盡乃心知無不言助益多矣又曰老成忠
厚方資之爲輔而遽沒嗚呼觀忠君臣之際始終德生榮
死哀亦可爲奇遇云卒贈少師謚忠襄

方賓字

浙江杭州府錢塘縣人洪武中大學生授刑部郎

中數月改兵部革除中署應天府事坐累謫戍廣東以茹瑄

召復兵部郎中會 又廟靖難賓與侍郎劉雋等迎 駕時見
委用遂進兵部右侍郎尋轉左四年雋出征黎賊賓理部事有
幹才應務不滯及雋死交趾進賓尚書益以通敏稱七年命扈
從北京兼掌行在吏部事八年扈北征賓與內閣胡廣金幼孜
楊榮侍郎金純叅畫密勿効力居多寇平尋扈還南京時侍衛
缺人建議勅遣大臣分行各處選民間子弟二十以上爽健者
備侍衛各處頗被騷擾其軍悉隸府軍前衛數至萬有餘立千
戶所五領之年至六十驗有老疾實狀兵部奏請疎放仍於本
州縣照名選補人多苦之以後十一年十五年十八年俱扈行
在侍寵放肆無顧藉公納賄賂已徹九重會十九年議親征戶

部尚書夏原吉約賓同諫 上怒命夏理邊儲於口北賓懼自縊見北兵部

陳洽字叔遠直隸常州府武進縣人自幼端重不爲兒戲甫成童已屹如老成人稍長貌奇偉長身玉立與兄濟暨弟浚同游鄉先生謝子蘭之門子蘭謂人曰陳氏兄弟才氣如此河東之薛不得專美於前矣且以遠大期之洽讀書力學淹貫羣籍尤工於書法弱冠用薦舉擢給事中命點軍卒過其自輒識其面且記姓名弗忘有再至輒笞之叱令其去總戎懼請罪洽上其事 上嘉之賜織金鵲衣一襲後又奏凡大臣犯重罪雖蒙恩宥不宜仍列本班必少加降抑以示勸懲 上從之詔敘列

八品九品後洪武丙子父以貞戍五開以歿洽去官至家時五
開蠻寇竊發簡劄將往以歸父喪或止之不應涕泣以行其後
觸瘴癘冒危險間關五千餘里竟負骨歸塋焉未幾少保兵部
尚書茹璠薦其才可大用遂奪情起復授文選司郎中壬午年
成祖入正大統首陞爲吏部右侍郎階嘉議大夫量才陞官銓衡
惟允復署地官事益有聲永樂三年乙酉遷大理寺卿持法平
恕民無告冤者丙戌交趾黎賊構逆朝廷興師問罪命覘賊
蹤跡調土兵三萬以佐總戎五年黎賊就俘交趾遂平改吏部
左侍郎除交趾流官旣還朝命掌春官事論功定賞人無間言
繼署冬官名譽尤振歲乙丑交趾餘寇簡定作亂仍命英國公

張輔率師討之洽實叅贊機務遂擒其兇渠簡定而還時北寇猖獗車駕親征承命偕英國公訓練士卒於塞外辛卯復往鎮交趾以慈和綏輯其民先教化而後刑法夷人安之蠻俗爲之不變而窮陬荒裔絃誦之聲相聞乙未還京師以功陞兵部尚書十五年再命出鎮交趾兼掌布按二司事仁宗卽位勅領交趾布政司按察司兩司仍叅軍事宣宗改元之初蠻寇黎利勢益張成山侯王通率師討叛仍與叅贊是歲冬十一月八日出師討賊洽以爲宜駐師石室縣之沙河以覘賊勢主帥欲渡河而陣又反覆論以利害且陳方略主帥弗聽翌日五鼓麾兵以渡洽弗能止次寧橋賊自己至未力戰洽遂自奮馬突

入賊陣欲擒其首惡身被創甚而了無怖色旣而墜馬左右扶掖欲還營中且曰主帥且退公何自苦如此洽張目叱之曰吾受朝廷厚惠四十年報國正在今日吾豈偷生忍恥者乎衆皆潰散洽奮勇持戈進手殺數人知力不能支大罵自刎而死賊相視駭歎洽自筮仕卽居內庭恂恂謙謹清儉寡慾忠信孝友出於天性動止語默皆有禮度獎善嫉惡尤惡諂諛親仁好賢獨尚正直於人無所毀譽而遇之必以誠樂恬淡不事侈靡平生不畜媵妾所至惟家童二人以給便令晚年不喜飲酒閒居沉默寡言終日危坐人莫窺其底蘊有言兵者則曰兵兇器也古人尚德化必不得已然後用之博涉書史論至古將相忠

義之事必正顏定色英氣橫發擊節稱嘆若已有之雖有邊徼經營軍旅之務稍暇卽讀書自娛手未嘗釋卷其爲詩文敏健往往皆有思致卒之明年主帥棄城而歸交趾遂爲賊所據卒之日年五十有七贈少保謚節愍

趙珰字雲翰河南開封府祥符縣人洪武丁卯歲貢入太學授兵部職方司主事歷武庫司員外郎陞浙江右叅政小心愼密士林重之壬午擢刑部右侍郎永樂二年改工部轉禮部五年冬拜禮部尚書十年壬辰督創隆慶保定永寧諸郡治撫輯有方而新集之民悉安其業不知其勞丁酉改兵部尚書以內艱去已而起復專理塞外兵政疾作上遣內官偕名醫往視疾

已入謝復命調理於家既康復命詣塞北訪牧地遂具順州
處以聞於是出厩馬牧之孳畜蕃息壬寅大駕北征命督軍餉
措理有方兵食充給 仁宗嗣位改刑部尚書蒞事南京詳南
京刑部